

- वक्फ संशोधन बिल 2025 राज्यसभा मांय पेश करी ज्यो—अल्पसंख्यक कार्य मंत्री किरें रिजिजू कह्यो—इण रो मकसद वक्फ संपत्ति रा प्रबंधन मांय साफगोई बधावणो है।
- एग्रीस्टैक योजना रा तैत 73 लाख ऊं बत्ता किसानां रो रजिस्ट्रेशन कर र राजस्थान देश मांय अब्बल रह्यो।
- केन्द्र सरकार देश मांय खाण—पीण री चीजां री गुणवत्ता तैय करण सारू बेगी ई एक सौ खाद्य परीक्षण प्रयोगशालावां खोलेला।
- प्रदेश मांय आज जयपुर, अलवर, करौली अर सीकर जिलां मांय हल्की ऊं मझला दर्जा री बिरखा रा आसार— कठे—कठे ओला पड़बा री चेतावनी।

000

वक्फ संशोधन बिल, 2025 माथे आज राज्यसभा मांय चर्चा व्हे रही है। अल्पसंख्यक कार्य मंत्री किरें रिजिजू सदन मांय ओ बिल पेश करता थकां कह्यो के इण रो मकसद संपत्ति प्रबंधन मांय साफगोई सागे वक्फ बोर्ड अर स्थानीय अहलकारां बीचे तालमेल बधा र अर हितधारकां रा अधिकारां री हिफाजत कर र शासन मांय सुधार करणो है।

केन्द्रीय मंत्री विपख ऊं ई बिल री हिमायत करण री अपील कीनी। वे ज़ोर दे र कह्यो के ई बिल रो मकसद वक्फ संपत्तियां रो बेहतर प्रबंधन तैय करणो है, न कि मुस्लिम समुदाय रा धार्मिक मामलां मांय दखल अंदाजी करणो। श्री रिजिजू कह्यो के बिल मांय मुसलमान महिलावां, खास तौर ऊं बेवा अर तलाकशुदा महिलावां रा माली अर सामाजिक हालात मांय सुधार करण री कोशिश करी ज्यी है। चर्चा मांय शिरकत करता थकां कांग्रेस रा सैयद नसीर हुसैन कह्यो के ओ बिल भरमावण वाळो है अर इण ने सांप्रदायिक ध्रुवीकरण रा मकसद ऊं लायी ज्यो है। श्री हुसैन ने बीच मांय टोकता थकां केंद्रीय गृह मंत्री अमित शाह कह्यो के विपख जनता ने गुमराह करण री कोशिश कर रह्यो है।

000

भारत अर थाईलैंड बीचे आज न्यारा—न्यारा हलकां मांय मदद सारू छह करार माथे सही करी ज्यी। आं मांय सूचना प्रौद्योगिकी, समुद्री, सूक्ष्म लघु अर मध्यम उद्यम, हस्तशिल्प अर हथकरघा समेत न्यारा—न्यारा हलका शामिल है। प्रधानमंत्री नरेंद्र मोदी अर थाईलैंड री प्रधानमंत्री पैंतोगतार्न शिनावत्रा बीचे आज थाईलैंड री राजधानी बैंकॉक मांय व्ही बातचीत पाछे अ करार करी ज्यो। बातचीत पाछे भेळा बयान मांय प्रधानमंत्री मोदी भारत—थाईलैंड रा रिश्तां ने साझेदारी रा तौर ऊं विकसित करण रो ऐलाण कीनो। वे कह्यो के थाईलैंड री भारत री 'एक्ट ईस्ट' नीति अर हिंद—प्रशांत नजरिया मांय खास ठौड़ है।

प्रधानमंत्री थाईलैंड मांय भारतीय समुदाय रा लोगां ऊं मिल्या जोरदार स्वागत रो आभार जताता थकां कह्यो के भारत अर थाईलैंड बीचे गहरा सांस्कृतिक रिश्ता है।

000

एग्रीस्टैक योजना रा तैत 73 लाख ऊं बत्ता काश्तकारां रा नाम मांड र राजस्थान देश मांय अब्बल रह्यो है। राजस्व अर उपनिवेशन मंत्री हेमन्त मीणा वीडियो कॉन्फ्रेंस रे मार्फत राजस्व अर उपनिवेशन विभाग रा अहलकारां सागे समीक्षा बैठक मांय आ जाणकारी दीनी। वे बतायो के प्रदेश मांय ई योजना रा तैत पात्र 81 फीसदी किसानां रा नाम मंड्या जा चुक्या है। मंत्री अहलकारां ने योजना बणा र काम कर र सगळा किसानां री फार्मर रजिस्ट्री करावण रा हुकम दीना।

000

केन्द्र सरकार देश मांय खाण—पीण री सामग्री री गुणवत्ता तैय करण सारू बेगी ई एक सौ खाद्य परीक्षण प्रयोगशालावां खोलेला। केंद्रीय खाद्य प्रसंस्करण मंत्री चिराग पासवान लोकसभा मांय आ जाणकारी दीनी। वे बतायो के फिलहाल देश मांय दो सौ पाँच खाद्य परीक्षण प्रयोगशालावां है। श्री पासवान कह्यो के भारतीय खाद्य सुरक्षा अर मानक प्राधिकरण लारला दो साल मांय तीन लाख ऊं बत्ता नमूना री जांच कीनी, ज्यां मांय ऊं 13 हजार नमूनां ठीक नी मिल्या। मंत्री बतायो के आं ऊं जुड़्या दो हजार ऊं बत्ता लोगां रे खिलाफ आपराधिक मामला दर्ज करी ज्यो है।

000

प्रदेश मांय गैर—कानूनी खनन गतिविधियां रे खिलाफ चलाया जा रह्या अभियान रा तैत आज डीग मांय जिला कलेक्टर अर एस.पी. पहाड़ी अर सीकरी हलका रो दौरा कीनो। ई दौरान जिला कलेक्टर खुदाई ऊं जुड़ी सामग्री ले जावण सारू गैर—कानूनी गेला बंद करण अर संबंधित पटवारी अर तहसीलदार ने आं गेला री निगराणी करण रा हुकम दीना। जिला कलेक्टर अहलकारां ने खनन गतिविधियां माथे सीसीटीवी अर ड्रोन रे जरिए निगराणी बाबत् ई कह्यो। ई बीचे बांसवाड़ा जिला रा अरथुना हलका मांय पुलिस गैर—कानूनी तरीका ऊं बजरी ले जाता थकां तीन जणां ने गिरफ्तार कर र तीन ट्रैक्टर जब्त कीना।

000

गम्योडा बच्चां ने ढूँढबा सारू राजस्थान पुलिस री ओर ऊं चलाया जा रह्या खुशी अभियान रा तैत झुंझुनू जिला मांय लम्बा बगत ऊं गम्योडा 26 बच्चां री पिछाण करीजी है। अतिरिक्त पुलिस अधीक्षक देवेन्द्र सिंह राजावत आ जाणकारी दीनी। वे बतायो के ई अभियान रा तैत तीन दिन मांय ई चार बच्चां ने दस्तयाब करी ज्या है। वे बतायो के खुशी अभियान सारू थाना लेवल माथे टीमां बणायी ज्यी है अर साइबर सैल री मदद ली जा रही है।

000

आईटीबीपी री 14वीं बीएन बटालियन रा जवान सीकर जिला मांय श्रीमाधोपुर रा रेहवासी रतनलाल गुर्जर उत्तराखंड रा पिथौरागढ़ मांय वीरगति हासिल कीनी। बर्फीली पहाड़ियां माथे निगराणी राखण रे दौरान ऑक्सीजन री कमी रे कारण वे देवलोक व्हे गया। श्री गुर्जर रा पार्थिव शरीर रो दाग काल वां रा गांव मांय पूरा सरकारी मान सागे कर्यो जावेला। मुख्यमंत्री भजनलाल शर्मा रतनलाल गुर्जर रे देवलोक व्हेवण परां सोशल मीडिया रे जरिये शोक जतायो है।

000

प्रदेश रा जयपुर, अलवर, करौली अर सीकर जिलां मांय आज कठे—कठे ओला पड़बा सागे हल्की ऊं मझला दर्जा री बिरखा व्हेवण रा आसार है। मौसम विभाग भरतपुर, झुंझुनू अर चूरू जिलां मांय ई हल्की बरसात री संभावना जताई है। राजधानी जयपुर मांय आज आखा दिन थोड़ा—घणा बादला मंड्या रह्या। लारला चौबीस घंटा मांय सब ऊं बत्तो 40 दशमलव 7 डिग्री सैल्सियस अधिकतम तापमान बाड़मेर मांय दर्ज करी ज्यो। जैसलमेर मांय साढे 39, चित्तौड़गढ़ मांय 39 दशमलव 2 अर जालौर मांय 39 डिग्री सैल्सियस तापमान दर्ज करी ज्यो। राजधानी जयपुर मांय अधिकतम तापमान 36 दशमलव 9 डिग्री सैल्सियस मापी ज्यो। मौसम विज्ञान केंद्र जयपुर रा निदेशक राधेश्याम शर्मा बतायो के ई उनाळा मांय पारो सामान्य ऊं ऊंचो रेहवण री संभावना है।

000

भीलवाड़ा शहर ने साफ अर रूपाळो बणावण सारू नगर विकास न्यास अर नगर निगम री ओर ऊं भीतां माथे पारम्परिक फड़ चित्रकारी करायी जा रही है। म्हाणा खबरनवीस बतायो के इण रो मकसद नुवी पीढ़ी ने संस्कृति री जाणकारी देवणो है।

000

चैती नौरता रा छठा दिन आज मां दुर्गा रा कात्यायनी रूप री पूजा करी जा रही है। ई मौके प्रधानमंत्री नरेन्द्र मोदी सोशल मीडिया संदेश रे जरिये कह्यो के मां दुर्गा रो आशीर्वाद भक्तां री जिन्दगी मांय नुवी ऊर्जा अर नुवा संकल्प ले र आवे है। प्रधानमंत्री नामी गायिका अनुराधा पौडवाल रो भजन साझा करता थकां कह्यो के इण ऊं सगळा मांय भक्ति भाव जागेला।

मुख्यमंत्री भजनलाल शर्मा ई सोशल मीडिया पोस्ट रे जरिये जनता री सुख—समृद्धि अर खुशहाल जिन्दगी री कामना कीनी।

000